

选举典

選舉典第六十一卷

辟署部藝文二

詩

送嚴維赴河南充嚴中丞幕府

唐劉長卿

久別邪溪客來乘使者軒
用才榮入幕扶病喜同樽
山展留何處江帆去獨翻
莫情思鏡水秋夢識雲門
蓮府開花萼桃園寄子孫
何當舉嚴助徧沐漢朝恩

送裴四判官赴河西軍試

前人

吏道豈易愜如君誰與儔
逢時將騁驥臨事無全牛
鮑叔相知田蘇頗同遊
英資挺孤秀清論含古流
出塞佐持簡辭家擁鳴騶
憲臺貴公舉幕府資良籌
武士佇明試皇華難久留
陽關望天盡洮水令人愁
萬里看一鳥曠然烟霞收
晚花對古戍春雪含邊洲
道路難暫隔音塵那可求
他時相望處明月西南樓

送李校書赴東浙幕府

前人

方從大夫後南去會稽行
淼淼滄江外青青春草生
芸香辭亂事梅吹動軍聲
應訪王家宅空憐江

水平

送韋侍御湖南幕府

李嘉祐

執憲隨征虜逢秋出故關
雨多愁郢路葉下識衡山
地遠從軍樂兵強分野閒
皇家不易將此去未應還

送崔校書赴梓幕

司空曙

碧峯天柱下鼓角鎮南軍
管記催飛檄蓬萊輟校文
棧霜朝似雪江霧晚成雲
想出褒中望巴庸方路分

送侯參謀赴河中幕

韓愈

憶昔初及第各以少年稱
君頤始生鬚我齒清如冰
爾時心氣壯百事謂己能
一別詎幾何忽如隔晨興
我齒豁可鄙君顏老可憎
相逢風塵中相視迭嗟矜
幸同學省官末路再得朋
東司絕教授遊宴以爲恆
秋漁蔭密樹夜博然明燈
雪逕抵樵叟風廊折談僧
陸渾桃花間有湯沸如烝
三月崧少步躑躅紅千層
洲沙厭晚坐嶺壁窮晨昇
沈冥不計日爲樂不可勝
遷滿一已異乖離坐難憑
行行

事結束人馬何躊躇感激生膽勇從軍豈嘗曾洸洸司徒公天子爪與肱提師十萬餘四海欽風稜
河北兵未進蔡州帥新薨曷不請掃除活彼黎與烝鄙夫誠怯弱受恩愧徒弘猶思脫儒冠棄死取
先登又欲面言事上書求詔徵侵官固非是妄作譴可懲惟當待責免耕廩歸溝塍今君得所附勢
若脫鞬鷹檄筆無與讓幕謀職其膺收績開史牒翰飛逐溟鵬男兒貴立事流景不可乘歲老陰沴
作雲頽雪翻崩別袖拂洛水征車轉嶠陵勤勤酒不進勉勉恨已仍送君出門歸愁腸若牽繩默坐
念語笑癡如遇寒蠅策馬誰可適晤言誰爲應席塵惜不掃殘罇對空凝信知後會時日月屢環紉
生期理行役歡緒絕難承寄書惟在頻無悵簡與憎

送石處士赴河陽幕

前人

長把種樹書人云避世士忽騎將軍馬自號報恩子風雲入壯懷泉石別幽耳鉅鹿師欲老常山險
猶是豈惟彼相憂固是吾徒恥去去事方急酒行可以起

贈友人罷舉赴辟命二首

杜荀鶴

罷却名場擬入秦南行無罪似流人縱經商嶺非馳驛須過長沙弔逐臣舶載海奴銀捶耳象馳蠻

古今圖書集成
女綵纏身如何待取丹霄桂別赴嘉招作上賓
連天一水浸吳東十幅帆飛二月風好景採拋詩
句裏別愁驅入酒杯中漁依岸柳眠圓影鳥傍巖花戲暖紅不是桂枝終不得自緣年少好從戎

送鄭谷先輩赴汝州辟命

張喬

看花興未休已散曲江遊載筆離秦甸從軍過洛州嵩雲將雨去汝水背城流應念依門客蒿萊滿
徑秋

送鄭侍御赴汴州辟命

前人

官從諫署清暫去佐戎旌朝客多相戀吟僧欲伴行河冰天際白嶽雪眼前明卽見東風起梁園聽
早鶯

送河西從事

前人

結束佐戎旌河西住幾年隴頭隨日去磧裏寄星眠水近沙連帳程遙馬入天聖朝思上策重待奏
安邊

送戴迪赴鳳翔幕府

韓翃

青春帶文綬去事魏征西上路金羈出中人玉筋齊當歌酒萬斛看獵馬千蹄自有從軍樂何須怨解攜

送劉評事赴廣州使幕

前人

征南官屬似君稀才子當今劉孝威蠻府參軍趨傳舍交州刺史拜行衣前臨瘴海無人過却望衡陽少鴈飛爲報蒼梧雲影道明年早送客帆歸

送李司直歸浙東幕兼寄鮑將軍

朱長文

翩翩書記早曾聞二十年來願見君今日相逢悲白髮同時幾許在青雲人從北固山邊去水到西陵渡口分會作王門曳裾客爲余前謝鮑將軍

送宋校書赴宣州幕

李端

浮舟壓芳草容裔逐江春遠避看書吏行當入幕賓夜潮衝老樹曉雨破輕蘋鴛鴦多傷別樂家德在人

送杜顥赴潤州幕

杜牧

少年才俊赴知音丞相門欄不覺深直道事人男子業異鄉加飯弟兄心還須整理韋弦佩莫獨矜誇玳瑁簪若去上元懷古處謝安墳下與沈吟

送崔琦赴宣州幕

盧綸

五馬臨流待幕賓羨君談笑出風塵身閒就養靈辭遠世難移家莫厭貧天際曉山三峽路津頭臘市九江人何處遙知最惆悵滿湖青草鴈聲春

送徐員外赴河中從事

姚合

赤府從軍美儒衣結束輕涼颿下山寺曉浪滿關城閒坐饒詩景高眠長道情將軍不戰術計日立功名

送陳侗赴江陵從事

前人

荊州從事衆皆聞幕下今朝又得君才子何須藉科第男兒終久要功勳江村竹樹多於草山路塵埃半是雲新什定知饒景思不應一向賦從軍

送韋校書佐靈州幕

朱慶餘

共知行處樂猶惜此時分職已爲書記官曾校典墳寒城初落葉高戍遠生雲邊事何須問深謀祇在君

送韓校書赴江西幕

前人

從軍五湖外終是稱詩人酒後愁將別途中却過春山橋榭葉暗水館燕巢新驛舫迎應遠京書寄自頻野情隨到處公務日關身久共趨名利龍鍾獨滯秦

送陳校書赴蔡州幕

章孝標

天假縱橫入幕籌東南頓減一方憂行齋健筆辭天閣坐見妖星落蔡州青草袍襟翻日脚黃金馬鐙照旄頭此行領取從軍樂莫慮功名不拜侯

送張員外西州從事

許棠

爲郎不入朝自是赴嘉招
鴈角初離首金章已在腰
劍橫陰綠野棧響近丹霄
迎驛應相續懸愁去路遙

送孫霽書記赴壽陽辟命

李中

辟命羨君赴其如愴別情酒闌汀樹晚帆展野風生淮靜寒烟斂村遙夜火明醉沈胸嶺夢吟達壽
春城舊友搖鞭接元戎掃榻迎雪晴蓮幕啟雲散桂山橫王粲從軍畫陳琳草檄名知君提健筆重
振此嘉聲

送胸山孫明府赴壽陽幕府辟命

前人

堪羨元戎虛右席便承綸綍起金臺菊叢憔悴陶潛去蓮幕光輝阮瑀來好向尊壘陳妙畫定應書
檄播雄才預愁別後相思處月入閒窗遠夢廻

送姚邵先輩赴汝州辟

李頻

行李事寒天京來聘禮全州當定鼎處人去偃戈年雷雨依嵩嶺桑麻接楚田遙知清夜作不是借
戎篇

送黃秀才姑孰辟命

徐鉉

世亂離情苦家貧色養難水雲孤櫂去風雨暮春寒幕府才方急騷人淚未乾何時王道泰萬里看
鵬搏

送從兄赴臨川幕

前人

梁王藉寵就東藩還召鄒枚坐兔園今日好論天下事昔年同受主人恩石頭城下春潮滿金柅亭
邊綠樹繁惟有音書慰離別一盃相送別無言

送張諷寺丞赴青州幕

宋梅堯臣

朝廷久清明賢相出賢牧賢牧又選賢森森備官屬是以邦政修良農播嘉穀上無租賦逋下有困
廩蓄往者河朔饑奔送劇臯鶯富公鎮青社有來咸鞠育病者調藥劑起者飼饘粥老稚四十萬瘦
骨生壯肉鄉縣將遣歸田園皆可復爲之置長犁爲之置黃犢旣完身上衣又付橐中粟庭下再拜
辭望城皆感哭他人守一方境內猶不足至今趙魏間食飲常醕祝富公離山東寇盜頗狂觸堂堂
高平公德業人所伏幕府得才謀螻蟻不勞撲上體憂勤心掃滅得神速張侯三十餘瑩若無玷玉
八字分濃眉純漆點雙目昨日奉辟書氣貌寧近俗言從必磊落事果無屈縮他時爲書功誰惜千
毫禿

鄭戴及第東歸後赴洋州幕

前人

卻生方得桂王粲始從戎一舸辭吳會單車入漢中亂山雲木古側徑野泉通欲識風煙美心知故國同

韓持國從富并州辟

王安石

韓侯冰玉人不可塵土雜官雖衆俊後名字久訇磕并州天下望撫字威愛愜千金棄不惜賓客常滿閣遙聞條風高爲子置一榻親交西門餞百馬驕雜選子材宜用世談者爲嗚咽矧今名主人氣力足呵欲推賢爲時輔勢若朽易拉會當薦還朝立子在閭闔惜哉秣騏驥賦以升龠合咨予棲棲者氣象已摧塌他年佐方州說將尙不納況於聲勢尊豈易取酬答有如持寸莛未足感鞶韞顧於山水間意願多所合匡廬與韶石少小已嘗蹋風游會稽春雪宿天柱臘淮湖江海上慣食蝦蟹蛤西南窮岷嶓東北盡濟漯身雖未嘗歷魂夢已稠沓荆溪最所愛映燭多廟塔溪果點丹漆溪花團繡罨扁舟信所過行不廢樽榼一從捨之去霜雪行滿領思之不能寐感若童蚋嚙方將築其濱畢景謝嚙嚙安能孤此意顛倒就衰颯唯子余所向嗜好比鸕鷀何時歸相過游屐尙可蠟

送子思兄參惠州軍

前人

云云曲江水天借九秋色樓臺飛半空秀氣盤韶石載酒填里閭吹花換朝夕笙簫震河漢錦繡爛
冠幘地靈瘴癘絕人物傾南極先朝有名臣臥理訟隨息稍稍延諸生談笑與賓客子來適妙年謁
入交履舄寂寥九齡後此獨望一國虞翻禮丁覽韓愈俟趙德孤岸鎮頽波俗流未易識我方文葆
中旋逐旌旗續去思今豈忘耳目熟遺跡更含殷勤言俛仰問乖隔當時府中兒侵尋鬢邊白下帷
雖著書不救饑寒迫謂宜門闌士官路久烜赫奈何猶差池更捧丞掾檄驥摧千里蹄鵬墮九霄翮
人生無巧愚天運有通塞試觀馳騁人意氣宇宙窄榮華去路塵謗辱與山積優游祿仕間較計誰
得失送君強成歌陟謁翻感激

聞侯舅應辟南征詩

程頤

辭華奔競至道離茫茫學者爭驅馳先生獨奮孟軻舌扶持聖教增光輝志期周禮制區夏人稱孔
子生關西當塗聞聲交薦牘蒼生無福徒爾爲道大不爲當世用著書將期來者知今朝有客關內
至聞從大幕征南垂南垂凶寇陷州郡久張螳臂抗天威聖皇赫怒捷音緩虎侯秉鉞驅熊羆宏才
未得天下宰良謀且作軍中師葢爾小蠻何足殄庶幾聊吐胷中奇

送范署赴天雄李太尉辟命二首

石介

我家泰山徂徠間濃嵐潑翠粘衣冠君來訪我茅屋下正直山色含春寒終日把酒對山坐幾片山
色落酒盤峯頭空好望無倦簞裏酒多傾不乾臨行再拜殷勤別請我一言披心肝吾貧無錢以贈
君門前峨峨橫兩山願君節似兩山高眼看富貴如鴻毛 伯樂之廐無駑駘豫章之林多瑰材相
君新坐碧油幢之子直上黃金臺秋風蕭蕭動笳鼓落葉撼撼鳴罇罍將軍手持十萬騎陣前號令
如疾雷從事借籌爲決勝運於掌上何恢恢蠱茲元昊命螻蟻西師堂堂難當哉況我賢相賢從事
北門無憂宜大開

小詩奉送擇之仁友赴漕臺之招後篇喜趙公之得士而不敢致私怨焉然別懷黯然不能成
章亦足以見區區也二首

朱熹

之子論交久深衷兩自知提攜方有賴離索遽成悲聖處應無數書來肯見私臨分莫惆悵努力共
心期 珍重東臺老英聲舊所聞能懷吐哺意豈但枉書勤得士看如許持心定不羣願言推此志
清濁見朋分

送何彥敬赴山東憲幕

元僧大訢

風物中州美人材聖代優恢恢光岳合肅肅羽儀修省署千官盛臺綱衆目收諸公多汲黯文掾獨何休健筆回天險精機洞鬼幽霆奔羣蟄奮鼇負五山浮責已常存恕知人庶寡尤平生周禮樂後世魯春秋西極銷鋒鏑坤維得綴旒元功推衛霍首罪竄共兜陳寶無祠雉桃林已放牛九天行日月一命重山丘幕府非閒散山東且勝遊飆車馳羽檄霜刃避吳鉤白下諸侯酒淮南使者舟風清捎退鷁月冷動潛蚪歷數無雙士誰爲第一流託交慚素昧道術得相求塵土縉衣浣山林白髮羞送君因有感暮色起滄洲

送曾伯滋赴西河將幕

明徐賁

上將初分閫儒官解習兵風旗春獵野雪帳夜歸營洮水從岷下祁山入隴平知公能載筆草檄報邊聲

送張孟孺

范汭

明時尙文不尙武屈膝低眉誰比數祖宗汗馬無乃勞今日橫金視猶土將軍素多林下風操觚羞

與荷戟同名高翻遺身難避幕府喧傳辟書至欲甘小草多苦辛白雲堪臥其如貧生憎朋舊問出處此意悠悠難告人

賦得雙佩劍送方生趨幕府

潘緯

延津雙玉虹神物合雌雄易用千金購難爲一割功塵埋餘斗氣歲遠結陰風感激封侯去龍鳴出匣中

醉中走筆送茂修赴留京督府幕

程嘉燧

少年好文兼愛武一朝破產誰比數得君昂藏未可輕不用人看尙如虎鬪然材氣凌萬夫安能低頭自拜趨舊京公侯擁貔虎食舍歌魚知有無書生袞袞登樞要時清只合容常調何由頓使一軍驚且須先與羣兒笑如吾萬事無可爲饑來也忍賢妻誚

辟署部紀事一

漢書兒寬傳寬千乘人也以射策爲掌故功次補廷尉文學卒史寬爲人溫良有廉知自將善屬文然懦於武口弗能發明也時張湯爲廷尉廷尉府盡用文史法律之吏而寬以儒生在其間見謂不

習事不署曹除爲從史之北地視畜數年還至府上畜簿會廷尉時有疑奏已再見卻矣掾史莫知所爲寬爲言其意掾史因使寬爲奏奏成讀之皆服以白廷尉湯大驚召寬與語乃奇其材以爲掾上寬所作奏卽時得可異日湯見上問曰前奏非俗吏所及誰爲之者湯言兒寬上曰吾固聞之久矣湯由是鄉學以寬爲奏讞掾以古法義決疑獄甚重之及湯爲御史大夫以寬爲掾

蕭望之傳望之字長倩東海蘭陵人也徙杜陵家世以田爲業至望之好學治齊詩事同縣后倉且十年以令詣太常受業復事同學博士白奇又從夏侯勝問論語禮服京師諸儒稱述焉是時大將軍霍光秉政長史丙吉薦儒生王仲翁與望之等數人皆召見先是左將軍上官桀與蓋主謀殺光光旣誅桀等後出入自備吏民當見者露索去刀兵兩吏挾持望之獨不肯聽自引出閣曰不願見吏牽持倒曳光聞之告吏勿持望之旣至前說光曰將軍以功德輔幼主將以流大化致於洽乎是以天下之士延頸企踵爭願自効以輔高明今士見者皆先露索挾持恐非周公相成王躬吐握之禮致白屋之意於是光獨不除用望之而仲翁等皆補大將軍史三歲間仲翁至光祿大夫給事中望之以射策甲科爲郎署小苑東門候仲翁出入從倉頭廬兒下車趨門傳呼甚寵顧謂望之曰不

肯錄錄反抱關爲望之曰名從其志後數年坐弟犯法不得宿衛免歸爲郡吏及御史大夫魏相除望之爲屬

尹翁歸傳翁歸字子兄河東平陽人也爲獄小吏曉習文法喜擊劍人莫能當是時大將軍霍光秉政諸霍在平陽奴客持刀兵入市鬪變更不能禁及翁歸爲市吏莫敢犯者公廉不受餽百賈畏之後去吏居家會田延年爲河東太守行縣至平陽悉召故吏五六十人延年親臨見令有文者東有武者西閱數十人次到翁歸獨伏不肯起對曰翁歸文武兼備唯所施設功曹以爲此吏倨傲不遜延年曰何傷遂召上辭問其奇其對除補卒史便從歸府案事發姦窮竟事情延年大重之自以能不及翁歸徙署督郵

馮奉世傳奉世以良家子選爲郎昭帝時以功次補武安長失官年三十餘矣乃學春秋涉大義讀兵法明習前將軍韓增奏以爲軍司空令本始中從軍擊匈奴罷復爲郎

陳湯傳湯爲射聲校尉坐免大將軍王鳳奏以爲從事中郎莫府事一決於湯

王尊傳尊給事太守府問詔書行事尊無不對太守奇之除補書佐署守屬監獄久之尊稱病去事